

產科心法

R271.4

2

光緒壬辰重刊

產科心法

浙湖王文光齊藏版

天地之大德曰生而胎產一事則天地以
其生之德寄之于人故以繁生齒而廣
綢緼之化者也顧其間或多難產以致莫
救是生也而殺之豈天地生之本意哉亦
由調攝醫治人事失其宜耳矣新安
汪樸齋先生以岐黃名家凡經診治者

雖垂斃亦多能救之大江南北推為盧

扁復出所著產科心法一書門別為四

曰種子曰胎前曰臨產曰產後條分縷析

提要鉤元其中依症附方率皆中正和平

劑玄峻猛之品觀其自序云蓋竭數十

年研究之力用之取效悟于心而應于手

者非玄剽取方書掇拾成說者可比信乎
救世之婆心而產科家之寶筏也予友周
君芾應得是書于山左携至京師兩好
轉相鈔錄郵寄梓里甲子孟夏李君固
莽見而喜之謂其精要詳明可補產科
機要救產金書達生篇諸書所未備是

宜公之于世爰率其本宗弟姪捐資付之
剞劂氏予惟是書成于乾隆庚子歲碩
止有鈔本流傳未廣歷今二十有五年始
以諸君子刊而行之而樸齋先生故世之
婆心乃以廣布于天下從此家有其書舉
所謂調攝醫治之方燦然具在上者融會

而貫通之固可以窺產科之精蘊次者
按症取方墨守其說而用之亦不致入于岐
誤將見子有姦斯之慶毋妄拆副之災而
天地生之之心因以快然無憾焉然則作者
刊者厥功均偉矣哉

嘉慶甲子仲秋月上浣二日石門蔡德淳序

并書



原序

蓋醫之一道。爲司命之司。原非容易。但能存心濟人。博考羣書。臨症體察。以人性命爲重。雖未能有聖賢之學。而虛實寒熱。表裏陰陽。辨釋明白。用藥得當。自不致于悞人。而產科一症。尤宜謹慎守法。略一錯悞。則胎不保。甚至產母亦傷。能無怨乎。至于產後。總屬氣血空虛。丹溪先生云。雖有他症。以末治之。此誠千古格言。自當遵前賢制方選用。斷不可以杜撰悞人。如無憂散。佛手散。生化湯之類。千古不磨。毋庸苟且。每見今人醫產。全不合法。一味杜撰好奇。名爲生化。實非生化之意。設遇體厚者僥

倖得愈。體薄者。禍必立至。至于產後汗出。須防元陽外越。泄瀉。卽防中氣下脫。喘急。更防惡露上逆。此皆產後極忌之處。而產後發熱。常有之也。緣下元空虛。陰虛生內熱。只須四物湯加童便。熱卽退也。間有瘀血不行者。有經風者。有停滯者。有蒸乳者。各審其因而藥之。風感者。用歸芎。補血之中。加黑荊芥一味足矣。蓋產時體虛。百節開張。腠理不固。易入易出。若表其汗。則元陽外越。未有不死者也。其停滯者。只於理脾之藥。加穀芽陳皮可矣。蓋脾虛則不運化。宜用陽藥以助脾溫胃。卽運化矣。須知產後有邪。總宜補中兼消。未有消而不補之理。有等初學無傳。

之輩。放膽竟用柴芩羌防山查神麴之劑。似治傷寒之病。忘却產後之身。至輕者變重。重者卽死。悞人不淺。真可畏怕也。況中風一症。乃血虛者多。內經謂治風先治血。血行風自滅。張景岳先生師其意。發有非風之論。此皆醫平人而言。尚謹慎如此。而況產後肝血空虛。虛生內風。更可知矣。夫天地有好生之德。吾儕寧不慎重于斯。而以人性命爲兒戲哉。予每見而憫焉。因產科心法。纂選成書。此吾數十年來用之效驗。悟於心而應於手。且簡而不繁。俾產家觀之爲準繩。則性命得以安痊。醫家一有準繩。則舉手無錯悞矣。噫。圓通之士。始可與言斯道耶。

乾隆四十五年歲次庚子仲春月

休寧樸齋汪詰纂并序

汪樸齋先生產科心法一書。向祇有鈔本。予與弟姪捐資刻之。以公諸世。自胎前臨產。以及產後。一切調治之法。無不曲折精到。犁然畢具。而開卷一門。則爲種子方法。夫有萬物。然後有男女。有男女。然後有夫婦。有夫婦。然後有父子。生育一事。乃天地自然之理。而必求種子方法。不幾涉于人爲乎。不知此蓋爲艱于子嗣者言也。顧艱于子嗣者。或因祖宗德澤衰微。或因夫婦命宮剋制。或因本身體薄精虛。雖理數難知。大率不離乎此三者。近是是則求種子者。道有存乎其先者矣。其一宜積德。古來勸善之書甚夥。予獨愛漢昭烈帝。勿以善小而不爲。勿以惡小

而爲之二語。夫小善必爲則大者可知矣。然善之大者。必有大經濟大力量。而尤必有大機緣。遇者蓋少。至于小善。則人生一日之間。自朝至暮。一出一入。一言一動。罔不有善之可積。所謂德無論陰不陰。只遇着善端。便勿錯過是也。善必自倫紀之地積起。乃爲有本。推而至于濟人。又推而至于利物。積者積也。日積月累。以小成大。而善量于是乎充矣。爲善必先去惡。惡之大者。人皆知其傷天理。損陰陽。固不爲也。至于小者。人每忽之。不知惡無論大小。一念之微。一事之細。苟有傷天地之和。卽宜戒之。慎之。大要總在去刻薄。從忠厚。務使方寸之內。慈愛惻怛。無

非一團生生之機。行之久久。自可扶祖宗之德澤。挽命宮之尅制。而承先啓後之道在是矣。其一在節慾。夫外遇之邪淫。正人所不爲。至妻妾之間。亦宜有節。節者亦積也。不知積而以有限之精神。供不已之淫慾。譬如激川之流。而水必涸。蕩家之產。而用則窮。延嗣經云。元精耗竭。慾熾神疲。若此類者。欲求其種子焉。可得乎。惟能節慾。則精神充足。志氣清明。生子必然康強壽考。聰明端秀。語云。寡慾者多男。貪淫者無後。是慾之不可不節也明矣。予觀樸齋先生是書。于種子一門。特揭明云。其法先宜積德存陰。陽可見。積德爲種子之本。至精薄體虛之人。則有五

子種玉丹一方。以補填精髓。然與其精既竭而藉藥餌以補填之。何如節之而使不竭之爲得乎。卽或稟受怯弱。本質虛羸。然惟能節慾。而後藥力之滋補乃有效耳。予故因刻是書而復爲申論之如右。或有謂予曰。子之論是矣。而尙未得嗣何也。予曰。古人所謂行年五十而知四十九年之非者是也。

嘉慶九年歲在甲子季秋上浣二日石門李超恒識



調經種玉湯

凡婦人無子。多因七情所感。致使氣盛血衰。經水不調。或先或後。或淡或紫如血塊。或崩漏帶下。或肚腹疼痛。或子宮虛冷。不能受胎。宜進此湯。

當歸

酒洗 四錢

川芎

四錢

吳茱萸

泡四錢

陳皮

三錢

白茯苓

三錢

香附

製三錢

延胡索

三錢

丹皮

三錢

乾姜

炒二錢

熟地

六錢

官桂

二錢

熟艾

二錢

白芍

一錢

若過期而經水色淡者宜用桂

姜艾。

如先期三五日而經紫色者。方中去桂姜艾。加條芩。一錢。

右剉四劑。生姜三片水煎空心溫服。渣再煎服。待經至之日服。